

Inatsisartut suleriaasianni § 37, imm. 1 naapertorlugu Naalakkersuisunut apeqquut imaattoq matumuuna saqqummiuppara:

Naalakkersuisunut apeqquutit:

1. Paarlakaallutik suliaartortartut aamma aalajangersimasumik atorfeqartut, suliassanik assingusunik suliaqartartut, akissarsiaasa, pensionisiassaasa, bonusisiassaasa, ineqarnermut, angalanermut iluaqutissarsiaasalu allat ataatsimut aningaasatigut nalingat qanoq annertutigisumik assigiinngissuteqarpa?
2. Ilumoorpa paarlakaallutik suliaartortartut akissarsiamik aalajangersimasumik 15 procentiinik ilassutitut pensionisiaqarsinnaasut imaluunniit suliaartornerup naammassinerani ataasiartumik bonusisiaqarsinnaasut, aamma sooq aalajangersimasumik atorfeqartut atugassarititaasunik taama itturnik neqeroorfigineqanngillat?
3. Paarlakaallutik suliaartortartut qassit ineqarnerat akilerneqartarpa, ineqarnermut aningaasartuutit suut matussuserneqartarpat, sulisumullu ataatsimut qaammammut agguaqatigiissillugu aningaasartuutit qanoq annertutigippar?
4. Sooq najukkami najugaqartut aalajangersimasumillu atorfeqartut assingusumik akeqanngitsumik ineqartinneqanngillat, ineqarnermut tapiiffigineqanngillat imaluunniit aningaasatigut taarsiiffigineqanngillat?
5. Akileraarutit, pensionisiassat, bonusisiassat ineqarnermullu aningaasartuutit ilanngaatigereerlugit paarlakaalluni suliaartortartup aalajangersimasumillu atorfeqartup aningaasat atugassai qanoq annertutigisumik assigiinngissuteqarpat?
6. Akissarsiatigut atugassarititaasutigullu assigiinngissuteqarneq toqqaannartumik imaluunniit toqqaannanngitsumik assigiinngisitsinertut isigineqarsinnaanersoq Naalakkersuisut inatsisitigut nalilersimavaat, naliliinerlu tamanut saqqummiunneqassava?
7. Kalaallit oqaasiinik oqaasillit qassit immikkut akissarsisinneqaratik oqaluttaanermik, nutserinermik, sulisut nutaat ilinniartinnerannik imaluunniit kulturikkut attaveqartuunermik suliaqartarpat, ukiumullu suliassat tamakku nalunaaquttap-akunnerinik qassinik atuiffiusarpat?
8. Aalajangersimasumik atorfeqartunut akissarsiat aalajangersimasut 5, 10 imaluunniit 15 procentiinik annertussusilimmik tigumminniinnarnissamut bonusiliinissaq qanoq akeqassava, paarlakaallutik suliaartornermut aaqquissuussamut, inissanut, angalanernut taartaasartunullu aningaasartuutitut sanilliullugu?

(Inatsisartunut ilaasortaq Jens NapātôK', Naleraq)

Tunngavilersuut:



Paarlakaallutik suliaqtortarnermut aaqqissuussaq pisariaqartinneqartumik sulisussanik qulakkeerinninnissamut atorneqassaaq, kisianni Kalaallit Nunaanni Peqqinnissaqarfimmi sulisut immikkoortunut A-mut B-mullu avinneqassanngillat.

Aalajangersimasumik atorfeqartut najukkamilu najugaqartut ukioq kaajallallugu ingerlatsinerup ingerlaannarnissaa, najukkamik ilisimasaqarneq, oqaatsit aammalu napparsimasunut attaveqarneq qulakkeertarpaat. Taamaakkaluartoq sulisut avataaneersut bonusisiaqarsinnaapput, pensionisiassatut immikkut ilassutisisinnaapput, akeqanngitsumik ineqarsinnaapput angalanerallu akilernerqarsinnaalluni, najukkami sulisut namminneq ineqarnertik akilertarlugu aammalu oqaatsinut kulturimullu tunngasunik immikkut suliaqartarlutik.

Taamaattumik Naalakkersuisut sulisut atugassarititaasa aningaasatigut piviusumik qanoq assigiinngissuteqarnerat uppersnarsartariaqarpaat. Aamma nassuiartariaqarpaat sooq Kalaallit Nunaannut sulisussanik tikisitsinermit aningaasaliisoqartoq, maani najugaqareersut sulisoreersullu assingusunik tigumminniinnarnissamut atugassaqartinneqanngitsut.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermit paatsuungasoqassatillugu kalaallisut allassimasooq aallaavigineqassaaq.